

Mid-Day Dogri News Bulletin, 10th March 2025

समे — 12:25

<><><><><><>

JKLA

कठुआ जिले च इक्कै परोआर दे त्रै रिश्तेदारें दी हत्तेआ दे मामले गी लेइयै अज्ज जम्मू-कश्मीर विधानसभा च हंगामा दिक्खने गी लब्बा। सदन च सदस्यें इस मामले च जोआबदेही तय करने सने दोषिएं खलाफ सख्त कार्रवाई दी मंग पुट्टी। स्पीकर अब्दुल रहीम राथर होरें सदस्यें गी गुजारिश कीती जे ओह सोआलें दे समें दरान सदन दे कम्मै-काजै गी बवस्थित ढंग्गै'नै चलन देन। ऊ'आं सोआलें दा समें खत्म होने परैन्त सदन च फही सत्ता पक्ख ते बरोधी धड़े दे सदस्यें बश्कार त्रिक्खी बैह्सबाजी दिक्खने गी लब्बी। तोआई इस मामले उपपर सदन च अपने विचार रक्खदे होई मुखमन्त्री ओमर अब्दुल्ला होरें बी कठुआ च होई दिएं हत्तेयाएं दी सख्त निदेया कीती। उ'आं उ'नें आखेआ जे इस मामले उपपर सदन च चर्चा नेई कीती जानी चाहिदी ते सभ्मनें गी इस मामले उपपर सियायत करने थमां बचना लोड़चदा। उमर होरें सौगी परोआरें कन्नै हमदर्दी बी जताई ऐ।

<><><><><><>

LG Kathua Killings

उपराज्यपाल मनोज सिन्हा होरें कठुआ जिले च इक्कै परोआर दे 3 रिश्तेदारें दी हत्तेया आले मामले दी व्यापक ते पारदर्शी जांच दा हुक्म दित्ता ऐ। मारे गेदे लोकें दी पंछान 15एं ब'रें दे वरूण सिंह, 32एं ब'रें दे योगेश सिंह ते 40एं ब'रें दे दर्शन सिंह दे तौरा पर कीती गेदी ऐ ते इंदे त्रौ'नें दे शव जंदे शनिवारें कठुआ जिले दे दूर दरेड़े इलाके मल्हार च इशु नाले थमां बरामद कीते गे। एह त्रौ'नें जने जंदी 5 मार्च गी लापता होई गे हे। सोशल मीडिया पर इक पोस्ट च उपराज्यपाल होरें आखेआ ऐ ते उ'नें इस मामले दी व्यापक ते पारदर्शी जांच दा हुक्म रसाल कीता ऐ ते प्रभावत परोआरें गी हर मुमकन मदाद दित्ती जाह्ग। श्री सिन्हा होरें लोकें गी जकीन दोआया ऐ जे दोषिएं दा तौले पता लाइयै उ'दे खलाफ सख्त कारवाई पक्क गै कीती जाह्ग। उपराज्यपाल होरें मारे गेदे लोकें दे परोआरें प्रति हमदर्दी जताई ऐ।

<><><><><><>

DIG Team

कठुआ जिले च इक नाबालिक जागतै सने कुल 3 लोकें दी हत्तेया आले मामले दी जांच लेई इक टीम खड़ेरी गई ऐ। जम्मू-सांबा-कठुआ रेंज दे डीआईजी शिव कुमार होरें आखेआ ऐ जे मामले च आखर होआ केह ऐ, एह जांच दा विशे ऐ इस करियै इस मामले दे सब्बने पैहलुएं दी जांच कीती जाहग ते जांच दे नतीजे गी तौले गै सार्वजनिक बी कीता जाहग।

<><><><><><>

Ayush Ramban

आयूश मैहकमा रामबन लोकें दी सेहत दी दिक्खभाल ते दुआइएं दे बपार च नैतिक प्रथाएं गी बढ़ावा देने लेई महत्व आली गैह पुष्टा करदा ऐ, जेहदे च दुआइएं सरबंधी गतिविधिएं गी नियमित करने ते उंदी निगरानी लेई तोले गै इक अभियान शुरू कीता जाना शामिल ऐ। मैहकमा ओकड़ी आर्युवेदिक कंपनिएं उप्पर नेड़मी तक्क रक्खा करदा ऐ, जेहड़ी कंपनियां सौ फीसदी सेहत ठीक करने दा दावा करा'रदियां न। उत्पादे दी विश्वसनीयता गी जकीनी बनाने लेई आर्युवेदिक मैडिकल दकानें पर बी नमूने दी जांच कीती जाहग। मैहकमे आसेआ लोकें गी आखेआ गोआ ऐ जे ओह ओकड़े लोकें ते मैडिकल स्टोरें दी जानकारी दे'न जेहड़े खास तौर पर युवाएं गी नशे आस्तै दुआइयां देआ'रदे न।

<><><><><><>

Jammu Celebrations(byte)

देश दे होरने हिस्सें आला लेखा जम्मू कश्मीर च बी जंदी रातीं आईसीसी चैंपियन्स ट्रॉफी दा खिताब बड़ी धूमधाम कन्नै मनाया गोआ। जम्मू शैहरा च जंदी रातीं लोक शिड़कें पर उत्तरी आए ते ढोल नगाड़े बजाइयै ते आतिशबाजी करदे होई पूरे जोश कन्नै भारत दी जित्त दा जश्न मनाया। इससै चाल्ली होरने जिलें च बी भारत दी जित्त दा जश्न मनाने दियां खबरां हासल होइयां न।

<><><><><><>

Vocal-Competition

शास्त्रीय संगीत दे मन्ने परमन्ने दे साधक ते गुरु बी.के.साम्बपाल "रंगीले ठाकुर" हुंदी शिष्या रिधिमा वाजपाई नै 38में अंतर यूनिवर्सिटी राष्ट्रीय "वोकल सोलो" प्रतियोगिता च पैहली

थाहर हासल करियै समूलचे डुग्गर दा मान बघाया ऐ। जंदे रोज नोयडा च आयोजित इस प्रतियोगिता च रिधिमा लसटर यूनिवर्सिटी जम्मू दा प्रतिनिधित्व करै करदियां हियां। पैह्ला इनाम जित्तने आली उंदी इस प्रस्तुति च तबले पर उंदा साथ राहुल भारद्वाज ते हारमोनियम पर विशाल पंडिता नै दित्ता। राधिका शास्त्रीय संगीत दी इक होनहार दे अनुशासन साधक न। एह्दे शा पैहले उनें चंडरगढ़ च आयोजित नार्थ जोन अंतर यूनिवर्सिटी युवा उत्सव च बी दूई थाहर हासल कीती ही।

<><><><><><>

Weather

मौसम विभाग नै अज्जै थमां अगले इक हफते तोहड़ी जम्मू-कश्मीर च मौसम दा सूरते हाल बदलने ते केईं थाहरें उप्पर बरखा ते बर्फबारी दे असार जताए न। विभाग मूजब, अज्ज ते कल प्रदेश च हौली थमां दरम्याने दर्जे दी बरखा बरने ते उच्चिएं धारें पर बर्फबारी दी मेद ऐ। एह्दे परैन्त औंदी 12 थमां 14 मार्च तगर बी प्रदेश च टामीं-टामीं थाहरें पर बरखा त बर्फबारी दे असार न। एह्दे मगरा 15 ते 16 मार्च गी बी हौली बरखा ते बर्फबारी दी पेशगोई कीती गेई ऐ। तोआई जात्तरिएं, सैलानिएं ते ट्रॉसपोर्टरें गी सलाह दित्ती गेई ऐ जे ओह ट्रैफिक सरबन्धी दिशा-निर्देशों दी पालमा करन ते करसानें गी बी आखेआ गेआ ऐ जे ओह 18 मार्च तक अपने कम्में गी अगड़ा पाई देन।

<><><><><><>